

PAS: Pakatan harus berhenti berperang sesama sendiri
Malaysian Insider
April 29, 2013
Oleh Md Izwan

KUALA LUMPUR, 29 April — PAS hari ini menggesa rakan dalam Pakatan Rakyat (PR) supaya berhenti menyerang sesama sendiri, ini ekoran dua kenyataan pemimpin DAP supaya supaya pengundi tidak memangkah PAS pada pilihan raya 5 Mei depan.

Media melaporkan hujung minggu lalu Timbalan Pengerusi DAP Johor Norman Fernandez dan ahli jawatankuasa DAP Kedah, S. Neelamekan secara terbuka menyuruh pengundi supaya tidak mengundi PAS kerana agenda negara Islam.

"Hentikan daripada menyerang sesama sendiri .

"Kita telah pilih pertarungan yang kita akan lawan, janganlah serang antara satu sama lain," kata Ahli Jawatankuasa PAS Pusat Dr Dzulkefly Ahmad dalam satu sidang media di ibu pejabat PAS, di Jalan Raja Laut di sini.

Kenyataan Dzulkefly itu dilihat sebagai percubaan untuk meredakan ketegangan diantara pemimpin PR yang seringkali menggunakan media sebagai medan untuk berperang sesama sendiri.

Dzulkefly berkata kenyataan oleh dua pemimpin DAP tersebut bukan mencerminkan pendirian sebenar parti itu kerana kedua-dua pemimpin itu tidak berada dalam jawatankuasa tertinggi pusat (CEC).

"Selagi DAP pusat tidak buat kenyataan, iaitu CEC, saya tidak akan buat kenyataan.

"Saya tidak akan membuat kenyataan terhadap komen individu-individu tertentu," katanya lagi.

Permasalahan antara parti komponen PR timbul sejak penamaan calon lagi, malahan sebanyak 7 kerusi berlaku pertindihan dalam PR sehinggalah diselesaikan selepas hari penamaan calon.

Seramai 13,268,002 rakyat yang layak mengundi dalam PRU 13 kali ini.

Kedua-dua parti politik di negara ini, BN dan PR akan bertarung untuk merebut sebanyak 222 kerusi parlimen dan 505 kerusi DUN.

Pilihan Raya 2013 dijangkakan paling sengit dalam sejarah walaupun BN seperti diramalkan oleh ramai pihak akan terus menerajui negara selepas itu.

Walau bagaimanapun, PR tidak mustahil untuk membuat kejutan kerana buat pertama kalinya, BN bakal berhadapan dengan pembangkang paling tersusun.

Hakcipta © 2013 The Malaysian Insider

Source:

<http://www.themalaysianinsider.com/bahasa/article/pas-pakatan-harus-berhenti-berperang-sesama-sendiri/>

